

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O IZMJENAMA I DOPUNAMA ZAKONA O IZVRŠENJU KRIVIČNIH SANKCIJA
U FEDERACIJI BOSNE I HERCEGOVINE**

Sarajevo, februar 2017. godine

**ZAKON
O IZMJENAMA I DOPUNAMA ZAKONA O IZVRŠENJU KRIVIČNIH SANKCIJA
U FEDERACIJI BOSNE I HERCEGOVINE**

Član 1.

U Zakonu o izvršenju krivičnih sankcija u Federaciji Bosne i Hercegovine („Službene novine Federacije BiH“, br. 44/98, 42/99, 12/09 i 42/11), iza člana 61. dodaje se novi član 61a. koji glasi:

„Član 61a.

- (1) Rukovodilac ustanove, uz pismenu saglasnost osuđene osobe, zbog sigurnosti ili zbog organizacije izvršenja kazne zatvora, može federalnom ministru podnijeti prijedlog za premještaj na izdržavanje kazne zatvora u drugi entitet u kojem osuđena osoba ima prebivalište, odnosno boravište.
- (2) Sigurnosni razlozi ili razlozi organizacije izvršenja kazne zatvora iz stava 1. ovog člana moraju biti jasno obrazloženi i dokazani.
- (3) Rješenje o premještaju iz stava 1. ovog člana donosi federalni ministar, nakon pribavljene saglasnosti ministra pravde entiteta u koji se osuđena osoba premješta.
- (4) Protiv rješenja iz stava 3. ovog člana nije dopuštena žalba niti se može pokrenuti upravni spor.
- (5) Ako je prijedlog rukovodioca ustanove iz stava 1. ovog člana odbijen, novi prijedlog može se podnijeti u roku od šest mjeseci od dana prijema rješenja iz stava 3. ovog člana.
- (6) Troškove premještaja osuđene osobe iz stava 1. ovog člana snosi ustanova iz koje se vrši premještaj.

Član 2.

U članu 122. stav 1. u trećem redu iza riječi „saglasnost“ dodaju se riječi: „federalnog ministra i“.

U stavu 3. u petom redu na kraju teksta briše se tačka i dodaju riječi: „i posebnog propisa o pravilima unutrašnje organizacije kazneno – popravnog zavoda kojeg donosi federalni ministar.“.

Član 3.

U članu 123. st. 3. i 4. mijenjaju se i glase:

„Vlada Federacije raspisuje i provodi konkurs za izbor direktora i zamjenika direktora kazneno – popravnog zavoda, koje imenuje i razrješava na prijedlog federalnog ministra.

Direktor i zamjenik direktora kazneno – popravnog zavoda nisu državni službenici, imenuju se na period od četiri godine, a imaju status savjetnika nosioca izvršnih funkcija“.

Član 4.

Član 124. mijenja se i glasi:

„Član 124.

Direktor kazneno – popravnog zavoda može imati pomoćnike za rukovođenje pojedinim područjima rada.

Pomoćnici iz stava 1. ovog člana su državni službenici, a zapošljavaju se putem javnog konkursa koji raspisuje i provodi Federalno ministarstvo.

Pomoćnici direktora kazneno – popravnog zavoda imenuju se na period od četiri godine, a imenuje ih i razrješava direktor kazneno – popravnog zavoda, uz saglasnost federalnog ministra.

Po isteku mandata pomoćnici iz stava 3. ovog člana mogu biti ponovo postavljeni, a ukoliko im mandat ne bude obnovljen raspoređuju se na radno mjesto unutar kazneno – popravnog zavoda koje odgovara njihovoj stručnosti i kvalifikacijama.

Ukoliko raspored na radno mjesto iz stava 4. ovog člana nije moguć, na pomoćnike iz stava 1. ovog člana primjenjuju se odredbe o prekobrojnosti iz propisa o državnoj službi iz člana 133. ovog zakona.

Radna mjesta rukovodećih službenika iz ovog člana i poslovi koje obavljaju utvrđuju se pravilnikom o unutrašnjoj organizaciji kazneno – popravnog zavoda.“.

Član 5.

Član 133. mijenja se i glasi:

„Član 133.

Odredbe Zakona o državnoj službi u Federaciji Bosne i Hercegovine („Službene novine Federacije BiH“, br. 29/03, 23/04, 39/04, 54/04, 67/05, 8/06, 4/12 i 99/15) i podzakonski propisi doneseni na osnovu tog zakona, shodno se primjenjuju na osobe zaposlene u kazneno – popravnim zavodima, osim u pitanjima koja su ovim zakonom drugačije uređena.“.

Član 6.

U članu 232. stav 1. riječi: „sa Odjeljenjem maloljetničkog zatvora za maloljetnike u Zenici i Odjeljenjem u općini Usora“ brišu se.

U stavu 5. u drugom redu iza riječi „Bihaću“ dodaju se riječi: „sa odjeljenjem zatvorenog tipa“.

U stavu 6. u drugom redu iza riječi „tipa“ dodaju se riječi: „sa odjeljenjem zatvorenog tipa“, a iza riječi „Hercegovačko – neretvanskom kantonu – županiji riječ „sa“ zamjenjuje se slovom „i“.

U stavu 7. u trećem redu iza riječi „Tuzli“ dodaju se riječi: „sa odjeljenjem zatvorenog tipa“, a na kraju rečenice iza riječi „Orašju“ dodaju se riječi: „sa Odjeljenjem maloljetničkog zatvora i Odjeljenjem odgojno - popravnog doma“.

Član 7.

Član 234a. briše se.

Član 8.

Direktori i zamjenici direktora kazнено – popravnih zavoda zatečeni u mandatu na dan stupanja na snagu ovog zakona nastavljaju obavljati dužnost do isteka mandata, a ukoliko im mandat ne bude obnovljen sa danom isteka mandata raspoređuju se na radno mjesto unutar kazнено – popravnog zavoda koje odgovara njihovoj stručnosti i kvalifikacijama.

Ukoliko raspored na radno mjesto iz stava 1. ovog člana nije moguć, na direktore i zamjenike direktora iz stava 1. ovog člana primjenjuju se odredbe o prekobrojnosti iz propisa o državnoj službi iz člana 133. ovog zakona.

Član 9.

Ovaj zakon stupa na snagu osmog dana od dana objavljivanja u „Službenim novinama Federacije BiH“.